



# Angajoqqaanut paasissutissiissut - Tuberkulose

## Sakialluut Tuberkulose

TB-mik nappaateqartoqarsimavoq \_\_\_\_\_

Nappaat TB sakialluutip tappiorannartuanik patsiseqartoq puanniikkajunneruvoq ammatkaarli timip ilaani allami- meeqqani qungatsip qinersiini nappaataasinnaalluni. Tappiorannartut ukiorpassuit nappaateqalersitsinatik timimiissinnaapput.

## Tunillatsinneq

Inuit sakialluuteqarlutik quersortut tunillaasinnaapput. TB quersornikkut tangajortornikkulluunniit silaannarmi serpalinninnguuttunik najuussinikkut tunillaattarpoq anersaartuutigulli aseruttoornernit allanit tuniluutianninnerulluni. Nalinginnaasumik sivisuumik qanitanuinnag tuniluuttarpoq. Meeqqat inersimasunit tunillatsikkajunnerupput. Meeqqat sakialluummik nappaatillit tappiorannartunik bakterissanik annikitsuinnarmik piaasarmata, inersimasunut sanilliullugit tunillaasuungillat.

## Pitsaaliuineq

Meeqqat inersimasullu pappiaqqaanut taliminnulluunniit quersortarnissaat inassutaavoq. Pitsaasunik silaannarisarfeqarneq ullormullu arlaleriarluni ininik silaannarissaasarneq kiisalu ininik eqqiluitsuutitsilluarneq nappaatip tuniluunnissaraluanik annikillsitsisarpoq. Meeqqat tamarmik inunngornerminniit TB-mut akiuussutissinneqarnissamik (BCG) neqeroorfigineqartarput.

## Nappaammut ersiutit

Tunillatsinnermiit napparsimalernissap tungaanut sivisussusaa: Qaammatit- ukiut. Meeqqat inu-usuttullu akornanni nappaatit tuniluuttut amerlanersaat ersiuteqarneq ajorput ernerlutilluunniit peeruteqqittartunik ersiuteqartarlutik. TB nappaatigineqalernat tunillatsinnermiit qaammatip ataatsip arfinillillu akornisa qaangiunnerini nappaatip ersiutai tassaasut kissarneqarneq, sanigorneq imal. oqimaalliartunnginneq, quersorneq, unnuami aallerneq qiiaammisarnerlu takkukkajupput. Qaqutiguunerusoq qinersitigut, saanertigut naggussatigut amikkut ilaannilu qaratsap ameraasaatigut aseruttoornermut ersiuteqartarpoq.

## Nakorsartinneq

Nakorsartinneq kinguneqarluartarpoq qaammatilli arfinillit sivisussuserisarlugit. Meeqqat napparsimassutiginnikkaluarlugu tunillatsissimasut nappatsaalinarlugit nakorsarneqartarput.

## Taama nappaateqartoqartillugu maleruagassat

TB-mik nappaateqartoqartillugu iliuseqarnissaq Nunatsinni Nakorsaaneqarfiup akisussaaffigaa. Iliuseqartoqassatillugu peqqissaasoq TB-mik immikkut ilisimasalik nakorsarluunniit ikiortigineqartarpoq. Meeraq TB-mik tunillatsissimappat qatanngutit, angajoqqaat, qanigisallu allat TB-mik nappaateqarnerisut taamaasillutillu tunillaasuusimasinnaanersut paasiniallugu misissortittari-aqarput.

## Meeqquerivimmukaqqinnissaq

Meeraq TB-mik tunillatsissimasoq paasineqarpat immikkut naliliivigalugu meeqquerivimmukaqqissinnaalernissaa paasineqassaaq. Meeqqat TB-mik tunillatsissimasut amerlanersaat allanik tunillaasinnaangillat. Nunatsinni Nakorsaaneqarfik siunnersuisuusaaq.